

摘藻堂四庫全書薈要

集部

欽定四庫全書薈要

集部

御選明詩卷四十八

詳校官原任主事臣李斯咏

欽定四庫全書薈要卷一萬八千五百四十八 集部

御選明詩卷四十八

七言古詩十三

徐列

春日過趙凡夫山居即事

茂苑三月春色都錦雲五色開平蕪碧浪澄泓蕩蘭橈  
推篷忽列西山圖不禁殊勝來觸目神魂搖搖已馳逐  
願御長風跨紫霄且隨飛鳥盤空谷沉復同心恰兩人

探幽直抵支硎澳晴暉絢爛自吞吐萬壑千峯莽回互  
兜輿直上樹杪行短袷還從花底度亭臺秀聳非人間  
瑤光片片生雲霧丹石巖前茜草腓青霞榭裏啼鶯暮  
流水淙淙一徑通層崖巧鑿驚神工主人護惜局靈異  
重關窈窱藏蛟龍五丁徘徊不得啓隻腕奮決闢微濛  
玄溜斜飛千丈雪絕澗遙懸百尺虹恍疑惠子臨濠上  
不道秦王幸海東意氣縱橫凌白日山崩水涸俱懵懵  
蒼頭競出譁異事遊人蟻聚紛來視詫余弱骨不勝衣



何為狂赴若奔駟仰天大笑還應之歷落欽崎本狂士  
飲酒百日餘兩眸讀書萬卷無一字看山不用通姓名  
袖中漫滅襴衡刺呼馬呼牛任爾曹醉狂醒狂我自豪  
人生行樂且乘興那能窘束坐牢騷我聞主人才且賢  
何況蓬萊有謫仙芍藥參差開錦帙芙蓉罽毼覆霞箋  
畫閣雙題碧玉柱宵鐙對詠蕊珠篇咫尺瓊樓不可到  
對此飛流一惘然狂生雖狂解自處白眼看人得幾許  
寧令落落笑知音豈肯卑卑溷俗侶尚平痼疾已成顛

衛玠膏肓無復悛暫折危柯下奔嶺還依落照返澄川  
高山流水年年在勿令伯牙空絕絃

張鼎

登醫巫閭山絕頂

神州五岳神所居遼西乃有醫巫閭長城不能斷地脉  
靈氣盤結束扶餘翠屏萬疊遮大漠危峰千尺凌清虛  
砂頭西奔似駭浪山勢北曳同衣袂石壁巉巖俯絕壑  
泉流滴滴下深渠鼉岡硯礪苦折屐鳥道盤屈驚摧車

逶迤百折山之半別開一洞棲猿狙山樓突兀鑿新磴  
佛火荒涼依舊廬攀厓披棘上絕頂天風欲墮吹襟裾  
何當一掃狼煙息山巔可勒燕然書

楊鶴

題虎谿三嘯圖

青山日向微送客還山下行行出東籬去去離蓮社談  
深仙梵隱枯蒲漸似鐘聲入窈無陸公不語陶公笑因  
之拍手相擲揄擲揄咫尺還相失十年却破山僧律無

情翻作有情歸秦人誤逐漁郎出

李流芳

送程孟陽遊楚中

我昨勸君為楚遊喜君翻然即掉頭今日置酒與君別  
見君行色我始愁平生心知兩莫逆人言君癡我亦癡  
村扉城郭嫌疎索那能別此長為客去年送我揚子湄  
焦山落日江逶迤豈意今年復送君楚雲湘水勞相思  
君家書閣秋山中千山萬山松入風我亦買山梅花裏

誅茆卜鄰期子同惜哉此意不得遂連年飄泊徒西東  
人生萬事常相左飢來驅人欲誰那君今新得賢主人  
相將且拽寒江柁江月山花遠趁君詩囊畫本留貽我  
蓴羹

怪我生長居江東不識江東蓴菜美今年四月來西湖  
西湖蓴生滿湖水朝朝暮暮來采蓴西湖城中無一人  
西湖蓴菜蕭山賣千擔萬擔湘湖濱吾友數人偏好事  
時呼輕舫致此味柔花嫩葉出水新小摘輕淹雜生氣

微施薑桂猶清真未下鹽豉已高貴吾家平頭解烹煮  
間出新意殊可喜一朝能作千里羹頓使吾徒搖食指  
琉璃盃盛碧玉光五味紛錯生馨香出盤四座已歎息  
舉筯不敢爭先嘗淺斟細嚼意未足指點杯盤戀餘馥  
但知脆滑利齒牙不覺清虛累口腹血肉腥臊草木苦  
此味超然離品目京師黃芽軟似酥家園燕笋白於玉  
差堪與汝為執友菁根杞苗皆臣僕君不見區區芋魁  
亦遭遇西湖蓴生人不顧季鷹之後有吾徒此物千年

免沈錮君為我飲我作歌得此十斗不足多世人耳食

不貴近更須遠挹湘湖波

袁石公盛稱湘湖蓴菜美不知湘湖無蓴皆從西湖采去

以湘湖水浸之耳蓴菜初摘後以水浸之經宿則愈肥凡泉水湖水皆可浸不必湘湖水也今人但知有湘湖之蓴又因石公言謂非湘湖水浸不佳皆耳食者耳

程嘉燧

江上送超宗弟遊海門

人生良會難再遇常將骨肉等行路昔居山中無世情  
汝未勝冠余未娶誰知衣食旋相驅坐令流落那能顧

頻冬嶺北厭冰雪長歲江東足煙霧

弟嘗客章贛

去日艱難

真可惜後來離別知無數相逢且暫同遨遊狂波對酒  
升高樓江邊女弟留十日風雨賦詩殊未休汝更請為  
離別吟試聽長歌足哀音余愁一歌傷汝心汝今又向  
海門去能識江流深不深

孫履正履和北上余同舟送之入郡艤舟白蓮  
橋信宿臨別題贈長句

涼風一杯酒明月萬里心雙帆飛度吳苑樹澄江遠挂



秋河陰君過三山向京闕揚子津樓秋漲沒廣陵豪士  
邀醉君期我不來意起忽君不見梁園歸弄黃河舫驚  
沙刮地哀鴻高又不見吳都走馬來觀試霜葉覆階鴉  
滿寺壯心簸蕩功名疎劒歌蕭條風雨至逐君兄弟歲  
月深寸心匪石千黃金脫衣貰酒君酌斟君胡不飲心  
沉吟沉吟欲言向予久舊時好事還能否黃羅峰頭搔  
首問青天逸句驚人落杯酒此中二月梨花明綠莎錦  
湍飛羽觥千林皚皚雪照夜踏冰響屨空巖聲玉屏門

西初罷射揮鞭半醉歸侵夜將軍開閣遮馬迎琉璃燭  
晃金盤炙別來耕商甘隱淪此日感歎傷精魂令弟胸  
懷萬人略結束弓矢千金門仲今落魄向侯邸食魚有  
無那可論送君江邊天迢迢月明青天生夜潮我醉仍  
眠為君侶起看日暮陽山雨朝來移艇游邨南碧梧蒼  
翠藏精藍龍鱗古木不見日菱花演漾開風潭卷帷散  
髮蔭深樾此時賦詩思清發忽然二子就我來手指月  
出浮雲開谿橋石路皎霜雪顧影踏月心徘徊徘徊不

眠欲至曙預愁明日還歸去白蓮橋西題贈君千載知  
余送君處

送李茂修還山省母

男兒遠圖幾年志未得引領彎弧向屬國秋風辭家今  
始歸顏狀慘澹氣抑塞憶昨薦士尚書郎

殷職方公

知爾善

射間四方中丞側耳識名字轅門長揖生輝光西秦猛

士產靈夏

杜生少年大刀五十斤

長弓大刀仍善馬令與校射藜

萬人齊聲共呼出君下來趨幕府何逡巡報國無階自

致身里中輕薄休相笑陶母廚間正苦辛

走筆答贈胡京孺

丈夫身無羽翰長偏側江水滔滔阻相識白首逢君大  
道間一笑寒灰吐顏色五山低昂波浪高扁舟掀舞同  
秋毫截江破浪赴知己侯門噂沓譏徒勞世人豪舉皆  
如此朱絃半絕心欲死顏厚難教伺貴人舌存未遣憂  
妻子城中泥淖十尺深多君疑曲投知音寧須百錢一  
斗酒自有片語千黃金男兒感激會下淚莫緣失路沾

衣襟

清明舟中

清明寒食山頭哭到處猶傳舊風俗無家自愧百年身  
有情共傷千里目漢陽渡口柳依依江風作花雪打衣  
經旬始過道士泐五日未離黃鶴磯吳王廟前烏銜肉  
又攪崩江作銀屋又魚艇子不敢行晝傍官船愁永宿  
春光忽開三月三紅桃寫鏡江拖藍煙花纔下兩孤北  
松楸正在九華南螺磯亭亭落日孤春原盡處是蕪湖

青煙白道人歸去紙錢挂樹啼鳶鳥

周敏仲同客過拂水莊阻風山廚蕭寂戲作

烈風振山石欲落亭午高眠縮雙脚髯郎扣門二客俱  
好事經耳宛如昨青春豪絲醉白髮綠水華燈蕩朱閣  
米家船從何處來但說東臯好林薄朱門如山酒肉待  
却犯顛風抵窮壑纜舟盡日不得去白浪喧阗斷煙郭  
自巡寒庖有濕葦走問東家無郭索樵蘇清淡亦恒事  
倚壁呻吟如可忤老夫猶云幸免俗且未燒琴思煮鶴

題畫雪景送炤師歸黃山喝石居

去年除夕師  
以余疾出山

茲感舊

作歌

蓮花峰腰三丈雪飛鳥無聲人跡絕山僧冒寒晨出山  
觸踏層冰附坼裂遠來問疾剛一笑寒釭結花如吐屑  
紙窗竹屋歲聿除馭隙光陰催電掣故人游山恨不俱  
愁我無緣上巖業

海虞公曾語  
炤師云云

八十衰翁老亡力賈勇扳

躋強得得前推後挽賴炤師掣肘牽裾抱腰褱穿屨渡  
壑捫確犖十步迴顧五步息忽然坐我天門間自怪平

空生羽翼此時日下千崖赤相去牛鳴望喝石崖松龍  
拏互相引林石人形如欲沫菴前矮垣齊及肩道上清  
泉纔沒跣仰頭天都五千仞俯瞰蓮溝十萬尺瞳瞳簷  
松樹羽蓋翳翳楓林排畫壁廿年茅齋落夢境方丈香  
廚共禪席牀下地爐火長活龕裏燈明磬方寂八月山  
寒苦風雨有客夜投同軟語山芋煨來手自剝秋芽焙  
出還親煮老人擁衾日僵卧小師蓮經晨夕課開門忽  
報下方晴喏喏空中靈鵲過



左光斗

報國寺看松同李懋明御史鄒匪石吏部

梵宇紛披松十圍  
龍鱗高挂鶴來歸  
擁護天闕心獨苦  
涉歷冰霜勢欲飛  
寒柯苒放伸勁鐵  
皴皮細感姿態裂  
怒枝雲霄敵蛟龍  
老根連蜷纏虹霓  
清風吹散何蕭騷  
妙音衆樂生波濤  
碧雲秋影橫僧榻  
金粉春花點客袍  
我聞廬山之松參  
天起孤高挺秀吸  
江水天柱龍山遙  
相望爾我貞心毋  
乃是長安遍地桃  
李花笑他天冶擅

繁華五侯七貴爭相看歲寒誰為過君家與君手挽長  
松株向僧還索長松圖安得攜松置丘壑遠避如今五  
大夫

聞啟祥

南關署中古梅一株南宋時物也徐青壁使君  
邀看有賦

我愛西溪似西磧梅花鱗鱗照溪碧十里五里香雲迷  
千枝萬枝玉筍劈我欲因之結伴遊誰知春向署中收

花枝次第巡簷發使人忘却西溪幽展轉看花被花惱  
一樹婆娑稱獨老蒼顏鶴髮足典型縱使無花亦自好  
使君愛花兼愛客斗酒潑花應不惜醉殘明月參橫昏  
還憶西溪花正白

送陸遂初山人歸梁溪

有美平原偶偶過平原里巋然六尺挺鬚眉腰下黃金  
紋蝕紫音操白雪和者稀大雅真能推七子與君把臂  
自秦樓紫螭黃柑好拍浮舉杯長嘯邀明月恨不相逢

共白頭相逢一日足千古烈士肝腸為君吐霜鏢芙蓉  
匣底寒空宵擊筑賦鸚鵡秋風蕭瑟蒹葭濕江水迢迢  
岐路泣送君南浦折柳條年年折柳長相憶

侯恪

題蘇漢臣鸛蚌圖

秋風瑟瑟蘆花白秋山如洗澗泉碧夕陽遠挂楓樹林  
鸛蚌無心相逼迫蓑衣漁子下垂綸却看手取如有神  
人生萬事皆如此誰為此圖蘇漢臣

高道素

臨淮秋夜

鳴橈伐鼓漾回波美酒千鍾開櫂歌  
秦箏甫停越謳發落日微風雙翠蛾  
芳年易盡瑤華晚白日朱顏愁不返  
橫笛他鄉未忍聞空齋獨坐成長歎

屠本峻

潮生

潮生君未來潮落君又去來去總無常  
勞勞西江渚江

渚月明潮又回郎行那得好懷開明朝試看天邊月不  
待潮生蕩槳來

莫是龍

秋夜汎月龍潭聽賈客吹簫

空潭浩渺秋如練竹樹千家隔波面獨倚飛艫泊夜潮  
冰輪一片林端見江頭賈客愁如何參差紫玉聲鳴鳴  
欲絕不絕還更續飄颻細入寒雲多恍疑清籟因風舉  
又似孤凰求鳳侶泣盡鮫人百斛珠織成嫠婦千條縷

江南八月煙水深魚鴈寂寥鄉國音我亦聞之不能寐  
曲中誰念客苦心一從簫史仙遊去嶰谷枯篁香難御  
今宵若遇玉容人青天定有鵲鸞處

謝三秀

郭外看春山集任去疵齋頭作

花信風高繡幕垂牆東深樹語黃鸝向夕張燈留客處  
漫空飛絮困人時春寒側側春衣薄隔水流雲度幽閣  
小史紅牙按柘枝細君綠醪浮桑落陶然淺飲亦沾醉

眼底幾人能得意不如裴几看南山鏡裏芙蓉寫煙翠  
潯陽江上望匡廬

落日半銜江上峰峰峰矗若青芙蓉香爐五老在咫尺  
令人一見開心胸昔賢餘韻滿中谷社裏蓮花洞門鹿  
耳根萬馬呼天風無乃懸巖瀉秋瀑冥探未暇客愁生  
徙倚蓬窗空復情不如覓枕且高卧呼兒為誦琵琶行

王同軌

虎丘舟中見楊花撩亂飛入幕內感而賦之



來時門前柳芽吐到日窳地條如許裊娜全傾掌上腰  
纖長故鬪機中縷垂條百尺任氄氄亂絮何緣飛滿天  
認是雪花霑不濕喚為梅片却成團畫舸筠簾遮不著  
美人紈扇撲半落眉從蛛網又颺來墮向蜂鬚飛復脫  
樓頭少婦方孤寢懷人起對妝臺冷莫惹春愁上剪刀  
休縈別恨歸衾枕縈恨惹愁飛轉賒紛紛逐我北還槎  
還時已化浮萍草應對池塘憶柳花

梅蕃祚

後湖看荷花

山翠重重傍湖起北柳南楊映湖水水態秋來錦不如  
宛轉荷花三十里底用花開十丈長遶堤無處不聞香  
葉密花深難辨色紅衣綠羽鬪鴛鴦

宋登春

將之吳越別秦中知己

寒亭嫋嫋紫蘭枝曲池兩兩鴛鴦羽鴛鴦飛去蘭池空  
青山一別隔千里秦娥抱瑟歌陽春金尊綠酒照離人

酒清絃正苦腸斷不堪聞我有相思曲歌竟恐憂君明  
朝又向東吳去含情結思滿秦雲

柳應芳

長安送馬參軍之金陵

去去南遷客遠送黃金臺長江臘月春正來綠冰片片  
迎船開問君無事蓮花府一日看山定幾回

胡可復水閣

長夏宜人溪上住短薄疎籬圍水樹炎蒸不到蕭森處

轉壁迎山閣子開涼風度雨北窗來濕花吹集木蘭臺  
閣中別貯人如玉停波靜寫修蛾綠簾下凝妝看不足  
畫漿誰家載妓過倚闌竊聽歡聞歌盈盈無奈蕩舟何  
酒船歸後溪聲靜斜月窺河升半嶺照見雙栖梁燕影  
盛時泰

題史癡翁畫

老樹了牙鐵作柯亂竹縱橫拂雲起誰知一段秣陵秋  
寫在癡翁半邊紙癡翁癡翁蓬萊精有時拈筆人皆驚

想見卧癡樓上景狂歌醉舞鳴秦箏我本大城山裏客  
看君圖畫來君宅出門却被強題詩坐對疎棚荳花白  
汪元范

張恭父畫柳

近代何人能畫柳東吳張生稱國手沈周陸治不復作  
藝苑聲名生獨有是時燕京風日妍生也拈筆當窗前  
墨花片片落縑素千樹萬樹含春煙柔條宰地颺輕縷  
密葉隱天帶疎雨耳畔疑聞黃鳥聲宛然坐我江潭詩

對君此畫融心神頓令價比連城珍不須更寫河橋色  
落日蒼茫愁殺人

王嗣經

賦得千山紅樹送姚園客還閩

秋山無處無紅樹君歸獨向秋山去霜錦千章照客衣  
林霞一片隨行屨幾曲雲林到武夷幔亭高處坐題詩  
南天氣暖無冰雪直到春花憶此時

盛鳴世

送陳獻墀入計

朔氣渡河水生骨  
敝中小車傷遠涉  
竭來送客三日程  
不盡關山恨重疊  
與君相知豈徒然  
一片肝膽千秋懸  
感恩不忘國士報  
許心更受他人憐  
君今西去謁人主  
五王諸侯聯佩組  
漢家計吏開明堂  
黃金璽書誰比數  
朝罷從容下玉除  
天樂縹緲雲中居  
行過閣門問丞相  
挽回元化今何如

金鑑

贈同谷山人

太白之陽有同谷同谷之中白雲宿美人結廬谷口居  
朝朝暮暮雲相逐我來問君君不言雲裏長鑱種黃獨  
吳夢暘

暑夜孝若攜妓飲長橋上同諸從踏月歌

明月滿地寒如霜踏歌出門氣揚揚登橋仰面天蒼茫  
千峰萬峰挂女牆酒星客星為低昂老夫興好君相當  
阿渾阿咸底復狂袒跣大叫呼索郎長鬚仡仡催行觴



甘瓜碧藕壓酒漿其時天治誰為將黃衫蕩子青樓倡  
絳紗引出差飾妝氍毹狼藉脂澤薌嬌歌忽轉嫵媚娘  
前溪采菱音旋亡入宮變徵吾未遑坐來白露塗衣裳  
鬢毛刁騷肌骨涼烏棲月黑還洞房博山煙滅燈無光  
蟋蟀當戶逼人牀歡樂繼之慨以慷悄然無寢夜未央  
徘徊中庭何所望

吳鼎芳

清明日汎舟

似晴欲雨養花天湖中冉冉生白煙波光夾岸綠無際  
買得扁舟春可憐可憐最是清明節青青踏處盈盈艤  
陌上漸歌桑渡頭仍弄楫燕燕正飛來鶯鶯啼未歇幾  
樹啼鶯歇更啼幾家芳草綠初齊橋迴野渡還官渡路  
接山溪又水溪山邊水邊春風起松花柳花飛不已春  
風搖蕩棹歌前花香撩亂篷窗底棹擊空明濺酒衣中  
流容與澹忘歸西林落日東林暝隔水漁燈映遠扉

秋盡

茅宇掩深壑石燈懸屋梁坐來清不寐自起繞空房門  
外寒威知幾許牀頭猶有陰蛩語斷送空山一夜秋  
桐葉上瀟湘雨

吳兆

秦淮鬪草篇

樂遊苑內花初開結綺樓前春早來春色染山還染水  
春光銜柳又銜梅此時芳草萋萋長秦淮女兒多閒想  
閒想玉閨間羅衣正試單芳飈入戶吹帷動巧鳥當牕

攪夢殘因嬌麗日長安道相戲相要鬪芳草芳草匝初  
齊茸茸沒馬蹄芳草遠如暮望望迷人步將綠將黃不  
辨名和煙和霧那知數鳳凰臺上舊時基燕雀湖邊當  
日路結伴踏春春可憐花氣衣香渾作煙誰分遲遲獨  
落後誰能采采不爭前嬝嬝柔間路佳期何暇顧悠悠  
淮水湄遠道不皇思空生謝客西堂夢徒怨湘城南浦  
離未鳴鴉先愁歌乍轉倉庚正及時正及時先愁歌  
密取畏人窺疾行防蘚滑入深翠濕衣緣高香蘼穠寒

若將何為束芻欲待誰齒紅猶勝頰萸白却慚肌薜荔  
裁衣安可被菖蒲結帶豈堪垂盈綈盈襜羅衆芳蛾飛  
蝶繞滿衣裳蘭皋藉作爭衡地蕙畹翻為角敵場分行  
花隊逐對壘葉旗張花花非一色葉葉兩相當君有麻  
與臬妾有葛與藟君有蕭與艾妾有蘭與芷君有合歡  
枝妾有相思子君有拔心生妾有斷腸死羸歸若箇中  
輸落阿誰裏相向無言轉自愁芳垆過客忽疑秋別本  
辭柯何倚託傾青委綠滿郊丘雖殘已受妍心惜縱賤

曾經纖手摘芍藥多情且自留  
蘼蕪有恨從教擲人生寵愛幾  
能終人心安得采時同縈愁結  
念尋歸徑接珮連裾趁晚風情  
知朽腐隨泥滓會化流螢入幕中

雪浪菴看桃花呈恩公

白石累累如雪浪青山疊疊疑  
屏障孤菴結處絕人尋千樹桃  
花深又深吾師講散僧徒暇或  
行或坐桃花下悠然花下悟真  
機落花偏著定時衣處處飄來  
天女散紛紛銜出佛禽飛如此  
春山誰獨往城中人有山中想

磬戶疎鐘出谷遲。石橋流水和雲响。幾曲雲林望不通。  
惟將流水世人同。徐穿鳥語枝邊路。傳過經聲花裏風。  
步步留人春不盡。掩映嵐光無遠近。池上數株昨夜開。  
舊紅幾點逐沿洄。禪關自與仙源異。莫誤漁人不再來。

登五老峯望彭蠡湖

甲辰仲夏梅子庾喻宣仲  
曹能始林茂之同游凡半

月

適度含鄱口來登五老峰。千盤萬剝無人跡。雨過泥腥  
見虎蹤。一徑孤懸五峯背。煙嵐五點濃如黛。壁面起兮

矗相向石顏疊兮詭萬狀履觸雲生處身齊飛鳥上霞  
綴屏兮成錦霧瀰谷兮如漲峰頭霧雨峰下晴一邊湖  
樹夕陽明波聲直撼鄱陽縣江色遙分湖口城憶昔揚  
帆彭蠡左湖心迴歷看將墮今來頂上看湖光湖光射  
眼白如霜不知浮蕩蒼翠表只覺微茫衆山小林交陰  
兮青兕啼草丰茸兮故步迷遊人今夜何峰宿遙逐鐘  
聲度水西

王醇



題馬姬湘蘭所畫蘭竹卷

寒映秋芳數枝玉冰綃宛是湘江曲能使湘靈愴別魂  
瑤瑟泠泠怨秋綠霓裳奔月留難住錦衾紅燭生愁緒  
墨花化作秦淮雲猶向妝樓日來去

夜同曹野臣宿西清館

夕煙如雨滃山脚煙際園林隔層幕遙燈一點透微紅  
正月花枝閃螢爝路窮石子橫塘角小門輕響迸魚鑰  
紙幃絮被重重閣新詩攪思眠難著十載清顏夢中索

此宵是夢翻愁覺

吳門送劉元博遊楚

片芽淺淺江淥深江南畫船載楚心因君余夢瓜洲渡  
期君水宿夢相遇梁間敝笥江底魚三年意密見面疎  
寫與苦詩伴千里峽夜啼猿疑在紙

黃世康

新柳篇

靈谷看梅初駐杖青溪又見柳條長穉葉晴窺拾翠堤

流絲暗撲游春仗帶結柔腰不自持  
笛弄新腔那得知  
小樓思婦見愁別南陌  
征人折恨離離亭欲折  
未堪折  
昨夜迴風復迴雪  
黯黯妝成寒食天  
氍毹怯近清明節  
漢苑三眠髻欲斜  
隋宮一望雲半遮  
此時出谷鶯蠻鳥  
此時曳豔桃李花  
縈花狎鳥空青滴  
金縷千行照窗碧  
抹黛當壚何氏孃  
垂鞭繫馬誰家客  
客來索酒葡萄香  
中懸結綠衣  
蘸黃迎陰半上鞦韆  
架踏影爭登蹋鞠場  
場前歌舞少年路  
綺羅絳盡傷心樹  
但憐蘇小門庭清

誰知稽大林園暮一年柳色一年新  
新柳年年弄早春  
章臺曲斷驚殘夢月淡煙疎惱殺人

冒愈昌

聽南嶽六空上人彈琴

我聞唐時潁師宋義海千載琴心應有待  
開士於今豈後身  
朱絃一曲鼓青春  
春空雲漠漠春思生寥廓  
於水見瀟湘於山見衡嶽  
彈為山水音彷彿聞仙樂  
仙樂冷泠行樹中  
慧鳥流音和晚風  
虛言世上知音少  
君自心

如半死桐

鄭鄮

同諸子遊梅花邨次東坡韻

水簾洞過梅花邨耿耿歷歷空山魂素衣玄珮不可見  
風吹夢斷人黃昏久荒松菊謝良友尋遍山川皆故園  
歎息炎涼何處少此間氣候冬常溫歸雲僧共夜燈寂  
落日坐待朝光瞰仙姑已去酒田在萬樹花飛守洞門  
邨左有何仙  
姑賣酒田  
獨立高原令人醒空中天語如聞言徘徊

弔古渾多事且醉神胡白石罇

徐石麒

苦寒行句曲道上

天寒敕絮僵如鐵車輪乍轉車聲咽  
歷過千山萬山雲  
時飄三點五點雪皮膚蜩縮毛髮張  
塞驢蹄滑愁道長  
暮煙一點青句曲鞭梢遙指此中宿

郭紹儀

同官李匡山成寶慈言事被謫感而有作

花莫晒武陵花酒莫飲烏程酒武陵花豔迷人目烏程  
酒甘誘人口李公骨鯁天下奇壯志屹立山勿移此時  
朝廷重鈞黨阜囊霜簡無遲疑成公凜凜氣雄發夜漏  
沉沉整袍笏漳江學士孤鳳鳴慘澹長弘碧流血成公  
裂眚那肯平苦諫危辭三伏闕二公名義垂不朽二公  
既去儒林醜武陵花烏程酒花殘酒歇終何有君不見  
柳外東風動江樹輕薄紛紛飛作絮莫遣烏啼白下門  
予亦飄然拂衣去

魏學伊

九日同嚴知章澹如兄弟遊茶磨山

我來松陵尋好友到門恰值九月九主人大笑攜上船  
船頭載花復載酒舟子勸上姑蘇臺衆客首肯我獨否  
青山宜作生面觀耳目熟爛妍亦醜但問誰家富修竹  
我船便纜堤上柳布帆直指吳山陞起覽奇蹟竟何有  
洞庭縹緲波雲沉彷彿頑沙卧千畝細雨斜侵濕布袍  
放船倒出蓮花淒上方樹杪插浮圖石湖湖光照戶牖



隔林前度茶磨山共約聽歌到申酉驟觀山石勢頗仄  
愁無平壤安坏甌斯須簫管咽流雲畫船別駐清溪口  
蘆花楓葉舞涼風豈必美人垂素手同來伴侶大叫絕  
私喜茲擢良不苟寒蒲縛蟹一十輩烏巾注酒七八斗  
酒酣不厭觴令酷衆人或辭我輒受推牕更問曠與晴  
皎月若出當坐守

田狩龍

德香園初成邀同人水閣小飲

從教性懶似孝先一日一醉梅花前隨風艇子繫斷岸  
斜陽細雨二月天茅齋近構臨水際薄霧杳靄含溪煙  
竹樹無多露山色門前種菜十頃田黃昏偕友坐水閣  
蟹眼臨風手自煎隨意摘蔬供匕箸杖頭不少阮宣錢  
推窗涼月挂簷角西堂醉臥春風顛微波渺渺助清興  
明日山前花欲然

張溥

題汪爾張深山歲月圖

深山歲月良如此亂石槎松鬱成雨彈琴不見無可言  
泉聲淙淙漏天乳圖之高堂大厦中六月寒生晝忘暑  
萬竹一廬老其間飛禽落日迴沙嶼

姜采

簡余寒鐵

自我不見余秀才夏云徂矣秋風來我今一到秀才宅  
堂前堂後生蒿萊丈夫骯髒只如此誓欲破家去鄉里  
今日路旁一匹夫當時萬言干天子低頭俛眉心不辭

養雞牧豕身應爾吾今讀書停雲館仰天狂歌何衍衍  
有時野老扶杖過烹葵摘果酒先煖白公堤上波欲沒  
期君同看溪雲滿

蔡道憲

踏梅

閨風山上珮環聲流雲西去愁不行玉笛只吹人間曲  
不管湘娥夢未成漉漉月上青天去欲向瑤池歸何處  
雙成臺殿已煙深玉蕊香驕風滿路

送堵牧遊入覲

十月迎君南千里送君北一歲  
雙酒卮隨君變顏色誰能入  
長安便無故人憶下有洞庭上湘江  
為我留君不可得我在  
南君在北夢相思見顏色他鄉飯  
君強食歌再歌中嘆息

陳子龍

清明登越州門樓

高樓四望春風曉落花已滿江南道  
黛色橫天照白雲  
碧川繞郭連芳草芳草湖分屏障中  
千巖倒映金芙蓉

盡日紅妝明鏡裏幾處青山憶謝公

方以智

遊雲壑憶啟一玉龍峽

松高結舍西山側青草年年舊相識東風何故又楊柳  
昨夜為君發顏色歸鴻嘹唳越長林聲入龍山峽水深  
峽高明月照石壁隔嶺有人彈鳴琴一杯一曲彈未已  
西望龍山白雲起

從冶父道中還家

作客寒冬冬至節日夕北風何凜冽同雲布地卷茆村  
悲號中夜枯桑折五更風止天未明半空浙瀝雨作雪  
長塗一望高下平雞鳴門外無車轍披裘騎馬行雪中  
以手執鞭冷如鐵男兒他鄉自苦辛安居那得成豪傑  
荒田不種少人煙野河冰合橋梁絕馳驅百里始還家  
入門夜暗燈將滅道路風塵阻且長相逢氣結不能說  
親戚家人皆笑余年年歲歲長離別

陳恂

麟溪沈氏九松

我聞杜陵野老浣花溪上之草堂堂前四松初移三尺  
強當時作歌紀其事千載想見柯葉之青蒼麟溪沈氏  
之松勝錦里相傳南渡攜家植於此九株夭矯羅北山  
北山堂枕麟溪水麟溪子姓十九傳約畧與松五百年  
偃如車蓋散若霧捎雲拂月參高天我登北山山色好  
山中爽氣開晴昊偶逢蔣詡開三徑却似香山揖五老  
主人愛客兼愛奇拂拭几席罷圍碁圖書金石出箱笥



梅花衲畫老鐵詩諸公此地經過數坐石臨流翠成幄  
月波之酒清若空戶戶齊傾斛犀角酒酣最愛謾謾風  
古人知與今人同我將別去轉惆悵夢裏無忘十八公  
錢茶

題麗農山居圖

向子徒懷五嶽願摩空無力慚羽翰愚公之谷何蕭閒  
萬頃寒流山夾岸我昔扶筇看飛瀑往返刺促山靈笑  
君今結屋巢其巔囊雲弄月領清妙賣藥販屐堪逃名

種瓜青門待友生  
當軒晴對芙蓉萼  
并刀剪取琉璃屏  
此中佳趣說不得  
呼童快洗雙蠟屐  
展我欲買山依君住  
披圖早識山中路

黃淳耀

虞山喫虎肉作

猛虎入山山氣惡  
腥風倒射巖石落  
兩山邛岵不識虎  
謂是旄牛未生角  
扼虎之吭擘虎尾  
虎驚不及施牙齧  
東海無煩赤刀制  
南山已報白額死  
老夫羈旅春盤空

短衣匹馬行山中坐分羹臙飽欲死拔劍四顧吾何功  
邛忙邛忙莫倉卒儒冠為爾頻衝髮人間真有猛於虎  
勸爾拔身辭虎窟

梁于淚

竹西亭

茱萸灣水渙渙上有孤亭峙高岸而今冷落荒煙斷遊  
人不來蒼鼠竄問竹西人不辨惟有隴上舊畊夫五十  
年前說曾見

劉曙

喜雨

柳陰未暗江南綠，萬壑千林雨光足。  
堤上桃花點水平，巖頭雪乳飛泉曲。  
渺渺煙蓑何處歸，遊鱗灑潏遶魚磯。  
不然閒殺任公子，空羨如船赤鯉肥。  
亦有耽幽閉戶客，博山舊翠添新碧。  
夜聽空階環珮聲，朝嫌短綆鉗嬰窄。  
郊外泥香樓外絲，踏青休恨濕鰼脂。  
紫騮芳草吳綾襪，三月春風醉未遲。

葛一龍

靈巖山下尋黃二丈不遇

開門見山如見君  
渡湖相問不相聞  
籬邊野水淡秋色  
屋上老烏啼夕曛  
鄰人為說攜家去  
更入深山最深處  
溪寒路狹難獨行  
短棹空維烏柏樹

丹陽作

江流河流決如矢  
曲防新築巖巖起  
雲連粉堞雨重城  
風嫋綠楊三十里  
小時行遠不知勞  
每向長安過此橋

衰鬢還騎款段馬春泥滑滑雨飄飄

史滄如攜琴過訪

櫻桃花開山雨紅有客乘舟雲水東  
舟空祇餘三尺桐  
仙人氣骨林下風姓名不署神相通  
別云訪我若不遇  
自彈一曲出門去

周岐

風雪夜山中偶賦

一夜北風三尺雪四壁欲穿肌欲裂  
孤燈黯黯爐無煙

兩手握拳冷如鐵溪頭活水聲忽死巖下勁松枝盡折  
中宵擁被不成眠坐聽寒鷗叫荒穴

郭金臺

秋同石琬伯仲琳諸子遊坤月精舍

山僧門掩數竿竹魚磬無聲瓜果熟我來欲就石頭眠  
白日羲黃隱茅屋興來解却青山回野鳥銜花入幽谷

沈章

淮陰侯祠

淮水十斗泥半石行人入門三歎息王孫功高天下疑  
赤龍雌雄俱慙德前有渭水後桐廬進則不足退有餘  
曷不歸釣城南魚

陳梁

壽王叟

竹隱居士不入市手易一編三截韋顛毛下垂不復理  
于時有雞欄有豕牀頭有酒清且旨對竹銜杯聊自喜  
田舍翁願已足矣人生大都百年耳叟今四百四十幾



甲子壯夫之顏小兒齒南宮注名從此始

吳寅

得無咎書

去年書來花欲紅滿城桃李醉春風今年書來花欲落  
綠樹陰森人寂寞回首膠山一片雲無端忽向嶺頭分  
愁心欲託松間月一夜清風吹送君

八月十五夜山中

九龍山中蘿月涼誰家玉簫調鳳凰清歌宛轉續霓裳

山中之人樂未央  
樂未央天欲曙  
停杯悄然共相語  
明月未盡莫歸去

鄒斯盛

過陸清臣別業

水田剛數畝  
種菱兼種藕  
一方新築水田中  
四窗俱受藕花風  
古藤為杖竹為榻  
起看青山卧看月  
田間晨夕不閉關  
酒人自來還自還

燕子磯

江上危磯高百尺孤亭下看龜鼉宅一帶新沙秋剪青  
浪翻千朵蓮花白風颿如鳥沒雲痕野僧猶踞臨流石  
吳拭

湏陽峽

清晨醉別曲江守直下湏陽望峽口須臾舟子亦動容  
兩岸高插數百峰日氣在峽吐不得蒼嵐紫靄霏濛濛  
下視潭影無天色但見石根沒深黑十丈巖頭靈乳開  
百尋壁上暮鐘回餘峯一一斷復續蒼蔥各欲出風雷

舟中野客苦殘病決皆支頤攬奇勝不堪夕色下遙陰  
翠微枕上寒相競

吳騏

池魚因風雨逸去和錢天陶作


鑿陂種魚一千石隊隊銀鱗戲空碧風細翻騰綺縠紋  
月華吞吐珠璣色垂柳陰陰覆曲堤喁花唼草出連漪  
芙蓉密種防獺獺蘇合飛丸駭鷺鷥豈知八月秋風急  
疾雷傾雨天如失湖海田疇一望連羣魚四散何嗟及

魴鱖常材不足奇  
任隨波浪自遊嬉  
願留一二蛟龍種  
看取他年變化時

御選明詩卷四十八



御選明詩卷四十八



總校官庶吉士 臣侍 朝

校對官檢討 臣蕭九成

謄錄監生 臣周元

欽定四庫全書薈要

集部

御選明詩卷四十九

詳校官原任主事<sub>臣</sub>李斯咏



欽定四庫全書薈要卷一萬八千五百四十九

集部

御選明詩卷四十九

七言古詩十四

陳鴻

新秋

蟬聲昨日催秋至  
漸覺單衣捲涼吹  
閒吟最愛夕陽天  
水轉澄鮮山轉媚  
幾處桐陰清露垂  
蕭然物候翻相宜  
不知宋玉何為者  
畏見西風搖落時

買西園菊至招同社徐興公商孟和諸人花下  
小酌

幾處菊花殘西園餘數畝買來竹窗下折簡會賓友把  
酒坐花旁一齊衫袖香春天百卉媚不及此幽芳堦下  
涼風薄暮起枝枝低拂深杯裏願君盡醉宿我家明日  
更買西園花

王鎬

貧賤別

東郊野水瀟雲白萬樹嘶蟬生暝色弟兄貧賤易飛分  
氣愴尊前辭不得更須質酒送君行酒盡須還不計程  
細說江頭岐路錯共眠船底月華明人生三十行已矣  
榮槁存亡未可疑一屋同居媿士衡十年減產如張季  
相望行舟一葉飄孤舟倍覺路迢迢轉喉有意淚相噎  
背艫無言魂自銷寂寞無眠對蔓花對花獨醉更咨嗟  
寄語莫言為客苦縱非為客亦無家

無名氏

瀟湘八景詩

錄四首

瀟湘夜雨

長空冥冥雨飛急坐我扁舟浮夢澤  
湘水風生萬竅號  
昭潭雲起千山黑旅魂寂歷秋燈明  
耳根已熟江湖聲  
人生多憂亦多情中宵白髮滿頭生

洞庭秋月

纖雲不動金波浮冷光萬里開清秋  
青山一髮渺無際  
天影落鏡星河流中流無人萬籟寂  
夜深往往魚龍出

何人長笛在扁舟  
水遠天長露華白

漁村落照

湘江雨歇湘山明  
千村萬落開新晴  
急持襖襖挂屋角  
時聞欸乃煙中聲  
煙中日影交凌亂  
晚霞一抹斜陽岸  
網得鱸魚不入城  
柳外旗亭酒堪換

平沙落雁

荒陂日落沙渚黃  
新霜十里菰蘆蒼  
沙平水落雲影薄  
雁飛漠漠江茫茫  
江寒天遠西風急  
沙上霜晴爪痕濕

月明不怪雁奴驚江湖何處無矰繳

垂虹亭

見吳江志

石橋翊翊如游龍上有亭子名垂虹飛梁橫跨碧波上  
砥柱屹立波濤中氣吞巨區三萬頃目覽洞庭七十峯  
巖巒顯狀固非一江湖合勢遙相通醒心豐樂昔稱勝  
斯亭直與之相雄前年烽火亭燒毀劫灰徒逐東流水  
此邦壯觀已蕭條喜有孔侯復經始侯家清白素王孫  
葺舊補殘有倫理棟宇翬飛洲渚間窗扉輪奐煙雲裏

廟貌三忠自侯建遺像肅然人敬止邦人士卒共樂成  
鼓舞歌詩頌侯美從今過客踏靈鼇盡說登臨氣象豪  
秋水芙蓉翻錦浪寒汀落日散金濤風帆沙鳥近隱見  
煙雲竹樹森相交個中風景吟不足空對山川送游目  
停杯聽我歌此曲并刀快剪吳淞綠

錢月齡

花前

有酒當醉花前人莫教啼鳥傷殘春流光轉盼赴壑水

好花回首飛成塵請看自古繁華地年年惟見蓬蒿新

林運素

登天壇

我覽圖經尋岳瀆東至太行入王屋崎嶇千里不敢辭  
手策桃枝九節竹舉頭貪看華蓋峯驀然身入翠微谷  
上方樓閣與雲齊金碧交光射林麓探奇直度瘦龍脊  
千仞斷崖橫獨木虛皇之觀紫金堂絕勝洞天三十六  
日精月華左右分黛色參天如削玉崖下飛流太乙泉



自是天開通地軸巡山使者持赤刀咫尺蛟宮誰敢黷  
或聞仙犬吠仙燈或睹仙人跨仙鹿林泉處處愜予心  
摒擋琴書將卜築藥櫃蔴籠春復春蟠桃畢竟何年熟

吳孺子

望西山

西山像佛頭又如抹青黛常疑路不通遙遙削天外白  
鶴飛去杳不雙明霞潑天紅映江春風幾點桃花雨欲  
渡前溪問小艘

投項子京

湖上梅花出短牆一開半落湖水香  
春陽羞澀杏花細  
桃花李花亦不忙君家有酒藏牀頭  
可憐花月未肯游  
願君醉我君亦醉花前慎勿嗔  
莫愁房櫳窈窕欲留  
懊恨歸來纖月流不知此景誰能酬  
空將好句為君投

梵琦

春日花下聽彈琵琶效醉翁體

僕本南海人暫為北京客  
朝遊金張城暮宿許史宅  
二

月春風吹百花朱朱粉粉相鈎加銀鞍繡勒少年子對  
花下馬彈琵琶大絃掩抑花始開花重墜枝枝更斜小  
絃變作花爛熳雨點驟打煙濃遮鷓鴣從何來遠在天  
之涯鈎輶格磔忽驚起不知飛在誰人家又聞黃鸝聲  
睨睨如斷復續續復斷布指似嫌宮調緩別寫羣雁鳴  
霜暖蒹葭浦深風蕭騷一隻兩隻飛漸高天長地遠望  
不見使我回首心煩勞我謂少年彈且止錢塘去國三  
千里每到春來花最多鷓鴣能舞黃鸝歌去年隨雁同

沙漠聽此琵琶殊不樂少年笑我君太癡人生行樂須  
其時此中正自有佳處但畏閒愁纏繞之

宗泐

短歌寄魏仲遠

夏蓋湖吞上虞浦魏君家在湖邊住岸花磴草幾春秋  
白鳥滄波自朝暮知君愛客仍好奇畫船載酒如漢陂  
權歌中流日將夕璧月湧出青琉璃嗟哉隱居端有道  
世上無如閒處好王充遺蹟尚可尋賀老風流良不少

去年聽詔來京國識君臉紅頭半白別懷空與水東流  
海燕江鴻斷消息今朝聞有東州船尺書欲寄心茫然  
福源精舍地最偏安得與君湖上相周旋

賦一曲亭送趙本初待制致仕歸越

鑑湖一曲亭猶在風物千年長不改賀公去後趙公來  
山水無情若相待當時季真得賜歸黃冠未必全忘機  
爭似今朝玉堂老還鄉仍著宮錦衣鑑湖水闊吞平野  
酒船直到亭階下荷華晚日照尊罍楊柳春風拂簷瓦

題天童萬松圖

小白市太白峯二十里松居其中一徑陰陰翠羽蓋半  
空矗矗蒼髯龍太白之峯分九隴壯哉千古之佛宮香  
雲不動梵唄合樓閣倒影清池空左菴昔年此說法山  
谷答響撞鉅鐘只今九重城裏住夢魂夜夜鄞江東錢  
塘有客曰王蒙為君寫此千萬松座間慘慘起陰霧屋  
底颼颼生清風何來禪子松下度長衫大笠攜一筇亦  
有緇徒三兩公青林路口衣裳紅我初展卷欲大叫海

上湧出高巖從雲端縹緲下玉童有路似與天相通自  
憐平生不一到吁嗟老矣將焉從還君此圖袖手坐有  
目只送南飛鴻

聽泉軒為藏無盡作

若人有耳唯聽泉泉聲入耳長涓涓穿林出澗度妙曲  
萬古不斷冰絲弦此聲不來耳不往中自寂然遺外響  
青燈照壁夜沉沉獨倚軒窗月東上

來復

過海羅漢應供圖

大士受齋龍伯宮長驅蛟鰐爭先雄舳艫蔽天不敢渡  
馮夷伐鼓洪濤春騰身向來歷汗漫無乃變幻多神通  
兩僧後顧冰雪容浮焦近隨赤鯁公雲端噓氣作樓閣  
赤日照耀青芙蓉中有四鬼舁一翁雪眉垂領衣露胸  
海神候謁旌旆從赤珠吐燄流星虹跨鰲之叟癯而瘠  
手扶七尺邛州筇是誰彈舌呪老龍火髻電鬣燒雲紅  
五輪舒光迸五色一葦直渡猶行空泉登頗忤定初起



欠伸展臂來清風，跼蹐騎魚走百怪。  
擔簦負笈趨羣童，入山咫尺見臺殿。  
彷彿微聽青林鐘，開圖對我若舊識。  
便欲巢我雲門松，世間浮榮日萬態。  
過眼聚散空花同，誰知神變亦虛幻。  
徒逞狡獪驚盲聾，何如乘願降跡閭。  
浮中法雷大震開羣蒙，王城分衛飽香積。  
坐令四海歌時雍。

蜀府命題所藏唐十八學士瀛洲圖

十八學士瀛洲仙，文彩照世皆貂蟬。  
廟堂論道豁胸臆，

作藩開闢神堯天烈烈房與杜樹業光聯翩雅愛虞永  
興健筆鍊可穿褚公姚公才湧泉早以儒術窮磨鐫二  
蘇二薛何挺特王門獻納相後先主簿倉曹亦英俊天  
策從事尤魁然太學先生美雙壁參軍襟度冰雪妍宋  
州戶曹最清簡一時風雅同高騫朝談黃石畧暮校白  
雲篇所思在經濟末藝為足傳方今化雨清八埏西堂  
進講羅羣賢搜材直欲盡巖穴拔擢遠邁貞觀前畫師  
殊有意模寫精丹鉛却令千載後名高日月懸丈夫宏

達當如此誰能齷齪困一羶我願河清海晏三千年聖  
人端拱開文淵還期比屋可封俗淳古不獨圖像跨凌  
煙

題米南宮雲山圖

南宮米黻生殊方馳名畫史妙莫當墨雲翻空太陰黑  
功奪造化開微茫酒酣放筆情爛熳愛寫長林帶溪岸  
崑崙移得毫芒間數點浮雲落天半鴨嘴灘頭沙浦通  
鯉魚浪颭苔花風山胥路險不可履飛瀑倒挂青天虹

我憶南遊溯湘沔七十二峯長對面赤壁山高看洞庭  
一道澄波瀉秋練人生誰無丘壑懷可奈塵土羈長才  
子陵不遇劉文叔釣臺未必高雲臺展圖頗識舊行處  
彷彿微鐘隔煙樹荒盡菱租老未歸寄書欲問沙頭鷺  
遊遊方丈歌為劉嗣庭賦

吾愛淮南王種桂小山裏日與八公徒虛遊閒遁世劉  
郎今是淮南孫束書不謁諸侯門東望蓬萊覓方丈扶  
搖欲駕天池鷗秀眉長身髮如漆驚座高談頗奇逸浩

然俊氣橫清秋窮途懶屈黃金膝弱水豈無路飛仙邈  
難期蛻骨果有術富貴將焉為男兒胸次隘八區託身  
何處山巖居但令忘世即嘉遯漫由天地皆蘧廬朝揖  
洪崖君暮接浮邱伯挂劍扶桑枝種玉藍田石時人不  
識煙霞蹤南征北走如旋蓬九市滾滾炎埃紅白雲半  
間誰與同我有十笏地蒼苔圍香風乃在天竺飛來之  
鷲峯斯當掃月渡雙澗金沙別種金芙蓉燕坐獅子牀  
篝燈聽微鐘願洗玻璃酌甘露散花三繞毘耶翁

漁樂圖為茅指揮題

漁郎家住鷓鴣灣水雲千頃茆三間太平身不識官府  
只將網罟營朝餐大兒扳罾露兩膊小兒鳴櫓垂雙鬟  
煙波託命作畝畝蒲蓼不怕風雨寒東泛白蘋渚西泊  
黃蘆灘水邊長覓鷗鷺伴天上那識鵷鸞班得魚歸來  
慰妻子收拾絲綸坐蓬底菱租剩有輸官錢沽酒街頭  
糴新米紫蟹黃金螯白鯽丹砂尾錯襍羅盤餐交觀聚  
鄰里有身誰無衣食謀昨日紅顏今白頭銅駝陌上車

如流擾擾塵土何時休我愛嚴子陵脫身如老鶴釣雪  
桐江臺高情付寥廓人生胡為困羈縛對此新圖想丘  
壑扁舟弄月歌滄浪誰似漁家有真樂

題廬王子嘉古城讀書處

古城陰處饒古木古城城下煙水綠江上茆堂晝掩扉  
知是先生讀書屋先生山澤列仙癯篋無黃金家有書  
燈火辛勤三十載添得秋霜生鬢鬢清晨起待簷光白  
暮讀陳編眼如月堅心自下董生帷兀坐忘穿管寧榻

平生學邁師古人不負堂堂七尺身多病豈堪金帶繫  
歸來獨釣碧溪春富貴浮雲我何有不如相遇一杯酒  
古城山色年年青春風多種門前柳

守仁

螺山隱士歌

螺山有隱士飄飄仙者徒朝游螺之巔暮息螺之隅紅  
塵拂落身外事白首讀盡人間書不騎琴高鯉不釣任  
公魚手披演雅篇架列山海圖蛾司漫給五斗黛蛤浦



豈羨雙明珠槐臺封侯笑螻蟻楚開脫網怜蜘蛛人言  
大隱隱朝市小隱螺山無乃是何物老病香山翁隱作  
流官良可鄙酌螺之杯隱螺几坐對螺山淨如洗鈿屏  
矗矗鏡邊來佛髻峨峨望中起千林飛翠散晴空半島  
寒雲浸秋水我尋螺山居遂識螺山路一見螺山人再  
誦螺山句紛紛草堂文悠悠遂初賦丈夫無遠謀千載  
何足慕我本逍遙人亦有置網慮買山每寄沃州書寥  
落江鄉歎遲暮江鄉寥落不可留便當卜爾山之幽安

得神鰲負山去共踏青螺海上游

弘上人蓄秋山圖

萬峯霜晴翠如洗峯底行雲度流水西北高樓爽氣邊  
江南落木秋聲裏蒹葭潮長魚在梁白鷗飛盡天茫茫  
松根丈人讀書處時有疎鐘來上方仙槎影沒銀漢遠  
木末芙蓉為誰剪何處涼風送客船歸來似是東曹掾  
東曹頗笑未識機挂帆直待鱸魚肥山川搖落已如此  
不信草露沾人衣平生畫手不可遇坐閱新圖得真趣

題詩寄與沃州僧  
吾亦買山從此去

題任少監百馬圖

燉煌水涸龍駒伏  
未央廐前秋草綠  
驢駝負石玉門關  
舊苑空餘三十六  
憶昔高皇馬百匹  
駒駉車府無監牧  
只留太僕掌天閑  
不許田鴛食民穀  
古來貴良不貴多  
須信儉餘奢不足  
任監手畫百驂駟  
五色如雲散平陸  
八月風高水草甘  
飲嚙舒閒肆馳逐  
騅駟驪黃莫復辨  
水葉風花亂人目  
任公生遭太平世  
結思驅毫逞神速

四海無虞百將閒無乃圖形華山麓吾聞善相東門京  
坐閱羣龍服如燭帛家口齒謝家髭皎皎那容在空谷  
爭如下乘得休安骨相雖凡好毛肉杏花煙外柳陰中  
鞞絡無加飽芻粟嗚呼此畫世已稀徒有千金未輕鬻  
老矣支郎俊氣銷撫卷空歌天馬曲

題溫日觀葡萄次韻

龍局失鑰十二重驪珠迸落鮫人宮鑢刀剪斷紫瓔珞  
累累馬乳垂金風樹根吹火照殘墨冷雨松棚秋鬼哭

蔗丸嚼碎流沙冰鴨酒呼來漢江綠  
鋏削蚪藤劍三尺  
雷梭怒穴陶家壁  
曇胡醉起面秋巖  
一索摩尼挂空碧  
題張一村畫山陰巖壑圖

張侯寫山工寫奇筆力可追黃大癡  
鱸魚江頭一斗酒  
墨花散作秋淋漓  
前峯翠律如束笋  
後峯盤擎來不盡  
突馬方驚艷  
瀕高啼猿忽覺蓬萊近  
水楓離離開錦屏  
峽泉歷歷鳴瑤箏  
幽葩自炫晨露潔  
小草不奈繁霜零  
兵餘僧舍總搖落  
何意空林見樓閣  
十年碌碌走湖城

重憶山陰舊巖壑秋來日日愁炎蒸解衣思濯松風清  
輕包短錫從此去何處水邊無月明

題谿山小隱圖

自我初涉浮丘峯十年往還如夢中向來門舊半白髮  
只有山色當時同青榿叢邊數間屋夜夜白雲簷下宿  
道人心境雲共閒嘯傲雲林謝塵俗橋頭野客行遲遲  
歸來似有東林期一聲清磬萬山暝知是上方禪定時

題方方壺畫

方壺老人年九十醉抱金壺傾墨汁染得蓬萊左股青  
煙霧空濛樹猶濕危橋過客徐徐行白石下見溪流清  
仙家樓館在何處雲中彷彿聞雞聲古臺蒼蒼煙景暮  
藥草春深滿山路招取吹笙兩玉童我欲凌風從此去

贈杜監令安道

我聞昔者城南杜居室去天才尺五爭似中朝供奉郎  
夙夜忠勤侍明主憶曾隨駕征四方手持櫛鐻心遑遑  
南臨衢婺北淮海東下毗陵西武昌白旄所指無不在

天下承平髣髴改聖上從容問舊時感歎俄驚三十載  
朝回館舍即閉門閒披貝葉忘朝昏但願清貧得長壽  
萬歲千秋蒙帝恩

良琦

題碧梧翠竹堂

碧梧翠竹之高堂迺在玉山西石岡濃陰晝護白日靜  
翠氣夜含清秋涼堂中嫩人雙鳴璫不獨癡絕能文章  
北海李生共放曠東林惠遠同徜徉張騫乘槎下銀潢



奉詔遠降天妃香帷中靈風神欲語壇上五色星垂光  
舟迴鯨濤遡長江故人宛在江中央入門相見各青眼  
花間促席飛霞觴清歌遏雲錦瑟張亦有衆賓相頡頏  
襴衡賦就驚滿座寬饒酒深真醉狂黃河東流雁南翔  
軺車明朝歸帝鄉玉堂掖垣梧竹長題詩寄遠毋相忘  
正月四日夜宿溪上有懷

白日西沒江東注客子舟航暮城住自緣舊好數經過  
頗為微名早馳驚風前埜碓響初夜雨外漁燈映深樹

美人不歸煙水寒耿耿何由寫心素

七月既望玉山草堂分韻得爽字

草堂涼夜延清賞石徑楓林秋颯爽鄰屋不同南北院  
稻畦真似東西瀼彈琴石上風生衣載酒船來月蕩漿  
青山自與白雲期莫遣移文謝來往

妙聲

采蘭堂

去年采蘭蘭葉長今年采蘭蘭葉短秉芳欲寄路漫漫

國香零落風吹斷  
蓮華峯下采蘭堂  
永懷佳境不能忘  
上人開窗面山坐  
山水含暉吟謝郎  
三生誤落夫差國  
翠結瓊琚香不息  
目斷王孫游未歸  
江南春草連天碧

題乘槎圖

秋風駕洪濤  
靈槎中蕩搖  
恍如乘船天上坐  
帝青九萬無纖毫  
黃姑織女長相見  
歸來空記當時面  
至今海與銀河通  
何因再得相從容

題王弘邀淵明圖

江州刺史何為者載酒邀我廬山下乃翁在山不在酒  
解后寧辭為君寫遠公招之不肯留平生誰省王江州  
門前五柳至今在江邊桑樹水空流

題畫馬

真龍矯矯空大羣奚官牽來氣若雲黃金骨法頗清峻  
畫者似是曹將軍駕駘高驤飽芻粟白駒轅下傷局促  
方今相者多舉肥莫畫權奇須畫肉

畫師胸中有全馬二馬斯須生筆下中有一匹玉花驄

似是西來大宛者不羣不食意氣豪羞與二馬同凡槽  
使我見畫三太息于今誰是九方臯

皎皎白馬白於練首如渴烏目如電天閑騏驎人不見  
畫師為我開生面圉人牽浴定昆池落花滿地驕不嘶  
青絲絡頭無一丈挽住萬里崑崙蹄

前朝王孫善畫馬筆跡不在曹韓下君看榻上玉花驄  
風骨權奇絕蕭洒却憶至元全盛時四十萬匹皆吾師  
崇天門下宣入貢太僕牽來親見之李君愛馬人莫比

意氣相期論萬里千金買得真驊騮早晚騎之見天子

贈駱自然

駱生家在錢塘住正近曲江蘇小墓生來無目最善者  
自小學歌今獨步憶昔太平開樂府新聲傳得宮中譜  
摩訶兜勒西城來子夜吳歌自風土一聲悲壯梁塵飛  
二聲激烈行雲低三聲四聲山石裂魑魅夜走猩猩啼  
我來江上忽相見聽我履聲如識面殷勤道我攻詞章  
吾今衰也何由羨落花遊絲春寂寂來前再拜當筵立

為我揚袂歌一行滿堂聞之皆動色我本東西南北人  
如今天地盡風塵勞生觸事易成感使我泣下沾衣巾  
駱生駱生吾已老往事悠悠勿複道已將身世等浮雲  
莫把新詞故相惱掩琴罷坐求我歌我歌哀樂何其多  
人生百年能幾何駱兮駱兮奈爾何

花殤

去年高秋洞庭客贈我兩株木芍藥手種東臯未浹旬  
紺芽怒長紅英拆今年春深花滿枝噓霞弄日相因依

紅簇火城丞相至錦翻晴晝買臣歸當惜持顏色好  
使我行吟被渠惱看去還期到子孫歸來聊以娛吾老  
那知零落委泥沙雨咽雲愁共歎嗟柳色鶯聲雖復在  
游蜂戲蝶落誰家飄香墜粉無人拾游夢妖魂歸不得  
種樹空思郭橐駝寂寞因悲洛陽陌草堂獨坐見秋風  
彌信吾家談色空安得人間名畫手倩渠移入畫圖中

王有恒聽雨蓬

江南雨多春漠漠蘆葦中寬可淹泊坐聽蕭瑟復瑤琤



若在洞庭張廣樂木蘭之楫青翰舟斜風細雨不須憂  
筆牀茶竈便終日知我獨有滄浪鷗廿年攜書去鄉國  
蕪城草深歸未得援琴時作廣陵散魚龍出聽天吳泣  
江湖適意無前期身如行雲隨所之平山堂上看春色  
還憶江南聽雨時

為陳仲孚題薛公遠墨竹

前朝畫竹誰第一尚書高公妙無敵近世多宗李集賢  
房山真蹟那能得澹園學李殊逼真柳州半刺題銜新

鷺山之虛況多竹畫品近來應入神東臯溪傍草堂小  
羅池廟前春雨早三千里外見似人玉立長身照枯槁  
石湖今有太丘陳孤竹春陰生子孫清風高節在封植  
知有王猷來款門

仙家近題劉阮圖

白雲滿地迷行路溪流百折無由渡水上見胡麻有人  
雙綰紗仙家知己近失喜驚相問洞口碧桃開郎君何  
處來

元澗

贈畫師朱叔重

吾邦會稽山水府萬壑千巖如米聚平生癡絕顧虎頭  
道中應接亦良苦至今清響若耶溪童子山僧惟杜甫  
近代乃有高尚書時過雲門吐奇語麥秧天氣小藍輿  
移將長松在縑楮高標遠韻不復見寂寞溪山但風雨  
朱君叔重吳下來示我小圖雲一縷乾坤秀氣皆可得  
李郭董米開門戶林梢出沒煙霧中山骨隱顯帶洲渚

江南生意半春天  
天真平淡此為愈  
君誠破筆畫萬卷  
魏國風流敢相許  
如何叔重心好古  
布襪青鞋獨艱阻  
明年須償司馬約  
緣木青猿宿天姥  
老我尚堪歌勝游  
藝苑詞林期一補

清澹

寄仙巖翁

巾峯高插牛斗旁  
高人一出草木黃  
碧雲縹緲下溟漳  
直來竺國吳山陽  
吳山竺國山水重  
丹竈煙鎖蓮花峯

一聲兩聲猿嘯月十里五里松號風高人放浪得真趣  
半紙功名何足貴白頭黃卷對青岑金鳥飛上娑羅樹  
登鍾山唯秀亭

挹袂秀色時蒼蒼馮陵八荒隘九陽裂地長江走脚下  
巡簷赫曦當吾旁楚天吳天雲海寬千山萬山蛟龍蟠  
采石沙頭人喚渡大茅峯頂仙騎鸞眼底山川不盡識  
鮮花石路空輦迹憶昔玄島看波時六氣不動乾坤寂

牛圖

春光寂寂煙暈晴春風水波痕明溪南溪北小坡平  
我卻騎牛向溪曲溪曲嫩草嫩如玉記得當時農事足  
倒指數來三十年今觀此圖猶宛然只多舐犢雙崖邊

遊洞庭

我有山水癖周遊訪遺迹春宵宮畔住多時對面翠峯  
參天直偶乘飛雲到上頭上頭佛屋依雲隈庭前老樹  
作僧立井中神物為人遊湖吞八極天倒開赤烏半濕  
東飛來櫓聲驚裂馮夷窟沙渥點破銀濤堆扶桑枝枝

手可掇龍伯釣頭鰲欲脫影壓錢塘天目低雲盡崑崙  
月支闊身栖在仙鄉仙鄉時節長仙人共語紫霞裏霜  
橘顆顆黃金香青鞋布襪真快意玉馬金鞍又何貴回  
首人間一窖塵明朝弄月羅浮去

懷故人待一翁

吳中夜半北風惡自起開窗望天角東湖西湖作銀流  
大星小星如雨落道不同兮不為謀寥寥天地誰同儔  
彼美人兮在何處霜月冷浸秋海頭

多景樓

偶來古潤峯頭行峯頭傑閣凌空橫壓幘圓天若箇笠  
循簷萬國如輕萍分昏割曉泰華聳衝淮突漢黃河清  
浮玉仙壇劍氣赤紫金佛域龍珠明歸墟宏洩碧海立  
大江直下銀潢傾揚子渡頭帆脚正瞿塘峽口雷霆鳴  
玄鬣長鯨舞北極朱翎健鳥翔南溟龜臺霜寒月皎皎  
桃都霞濕花冥冥狼石曾知己化土甕城始信空留名  
英雄紛紛何足數天語察察當心銘張騫乘槎實可意



豎亥按步徒勞形伸手便堪扶日轂脫塵底用登蓬瀛  
六氣入口凡骨換回眸一笑清風生

吞碧樓

在日本九州

九州城曲樓三層披襟御氣歡吾登窗開曉色拂桑樹  
簾捲夜光橫玉繩上頭端堪謁紫府下面更可窺玄廷  
天帝垂衣日杲杲海龍穩臥雲冥冥方壺三神指顧裏  
渤澥百谷琉璃明棲身飲露老亦足理亂黠陟無開情  
時聽玉管鸞鳳鳴

如蘭

電珠泉為劉丹厓作

老蛟夜嚼陰山冰  
冰花碎作玻璃聲  
困靈驚趨罔象走  
一片青天落星斗  
金谷綠城春已空  
湘竹紅淚啼秋風  
仙人剪冰不成雪  
電子累累水中結  
照車十二何足多  
昆明魚目騰秋波  
嗚呼魏王千金購  
徑寸竭海徧網珊  
瑚柯珠兮珠兮奈若何

無愠

贈東林球侍者

天球卞璧為世瑞遇貴則賤賤則貴形山之寶迥不同  
赫然誰敢當頭覷我笑廬山十八賢蓮漏聲中開眼睡  
獨有淵明解見機暫爾攢眉便歸去上人親自山中來  
老我不必頻頻舉鐵牛耕破舌頭皮有口莫汲西江水  
道衍

題觀音巖

高閣凌虛如履地長江萬里來無際世人可到不可留

只許禪僧深夏住  
亂帆來往逐雲飛  
隔岸淮山擁翠微  
大士巖間常宴坐  
一燈夜照客船歸

采蓮為余唐卿賦

余君抱奇言不誇種菜擬學元修家  
臨溪築廬競誅草傍路樊園多編葭  
長鏡短鑊自成列不與文筆相交加  
畦界條條任衡縮溝澮一一隨紆斜  
種多不減三十品分苗撒子時無差  
溉灌未能親抱甕設計巧欲為翻車  
一畦既傳渤海薤五色更接東陵瓜  
新稔脆美初斫膾

嫩瓠肥白纔燂爬馬齒忽驚齊發覓牛乳始識駢垂茄  
芳心纏絲惡網蛛老葉畫摺忻涎蝸自能墾土不無穢  
便可應候登柔嘉長奴芟夷脚自赤老婢採擷頭還墜  
不令筐筥混葵藿反任鼎俎兼魚蝦莼羹自適頗豪邁  
萍蘆可辨何咄嗟誰云小摘畏傷指我欲大嚼嘗搖牙  
何時攜杖叩君室且需木耳并槐芽苟能真率見情親  
奚鄙酒薄兼尊汙一餐自足飽空腹豈特薑桂烹雞鴛  
丈夫不能知此味五鼎日食成淫奢君今措事慕諸葛

蔓菁隨處為生涯

山行

山前雨晴山後陰  
槿花繁羅徑深  
燒煙無數人家少  
樵子兩三來遠村  
斷橋流水不可渡  
落日孤猿空候吟

溥洽

送高懺首還越

昔我來吳今五年  
青山目斷東南天  
越音未改吳音熟  
每見鄉僧一惘然  
上人何來亦瀟灑  
纔打鄉談便能解

觀光上國及期還聽講長干前月罷梵公此地迹猶存  
為我重開懺悔門石橋花飛香杳鵲蓮池蛙靜雨黃昏  
夢中金鼓聲初歇却艤扁舟欲歸越碧草遙憐茂苑春  
蒼苔不掃峨眉雪竹間舊房蘿薜侵篋書芸消生白蟬  
人情懷土無古今悵悵終為莊舄吟我亦因之思禹穴  
負儋未息愁難任陸沉鄉井亦何事白鷗有盟宜重尋  
清鏡閣前湖水深曾為先人照苦心丈夫出處自努力  
贈言愧比雙南金

題王冕梅花揭蓬圖

王郎寫梅如寫神天機到手驚絕倫自言臨池得家法  
開縑散作江南春酒酣豪呌呼霜魄寶泓倒飲隄糜薰  
龍跳虎臥意捷出縱橫錯漠迷芳塵繁花不消千樹雪  
古苔蝕盡樛枝鐵縞衣綽約珮璫明夜夜貞心照寒月  
嗟予落魄西湖濱夢魂幾度入梨雲東風吹香趣流水  
斷橋愁送波汙汙一杯不到孤山土忽見王郎已千古  
還君此圖歌莫哀原草青青隔煙雨



覺澄

雪月溪山歌送天然道首座歸蜀

蜀路連雲知幾許策勤斯道耐寒暑撥開雲霧覩青天  
仍與孤雲為伴侶布慈雲施法雨竿木隨身能作主德  
雲不在妙高峯此去逢人休錯舉天風清江月明月巢  
夜鶴夢初醒門庭施設談玄者猶較石霜半月程常獨  
步常獨行三更月下迎空生回首廣寒何處是桂輪皎  
皎臨滄瀛曹溪水通一滴容納百川流不息黃金靈骨

今猶在白浪滔天無處覓覲面提當機疾華亭船子拋  
篙直截斷衆流達本源瞿塘三峽連天碧肩鉏斧上青  
山峭壁顛崖不可攀欲識洞山分五位須知堯率設三  
關人亦閒境亦閒蕭條茆屋兩三間五湖雲月誰消得  
萬里溪山獨往還

戒襄

長安壩河道中

三月臨平山下宿沙棠一舟帆數幅清晨鼓柁看山行

兩岸人家春水綠岸上人家挂酒旗幾樹桃花映修竹  
路人問我將何之我欲尋師向天目

法果

春日閒居

夕陽微茫斷橋暮蒼外何人問歸路鳥啼花落春復春  
江山風月無閒人情閒直覺遠山近雲到自然眉宇新  
煙蘿蕭蕭滿春谷山前芳草春復綠悄風猶急春尚寒  
幾樹綠鶯啼不足啼鶯却喚春草醒如此茆菴怯春冷

溪橋橫綠不度人溪口桃花臥橋影花枝並笑雲欲然  
杖頭雲破留青天好山一步一回顧千巖萬壑今眼前  
山頭雲松際色早晚對君君未識淳于夢王質柯點君  
不省如君何朱顏有時還不酡君不聞踏踏歌

情何濃目何瞭形骸龍鍾髻絲皜機關不破終于天有  
心曾悟幾浮雲有耳曾聞幾啼鳥檐樹不風枝自鳴落  
花半與春階平一天晴日已如是况此夜來風雨聲霜  
前柳條春後鶯好花落盡彈空箏

元公閉關菴中賦贈

桑樾挂柴門門前草盈丈龕室面梁溪意在嵩山上此  
時木落何紛紛主人竟日何所聞階前寸土亦是地慎  
勿踏破階頭雲君拚一坐十小劫我此秋林踏黃葉俯  
驚水走橋欲流仰視雲峯亂眉睫蒲團爛後成塵埃蒼  
苔忍沒蒿與萊樹杪晴嵐碧如洗請君試涉溪南來君  
不知青山久寒生綠苔山風欲遣柴門開

送達公入菴

出門了無意適見飛雲在天際歸來亦偶然院荒何處  
無苔錢鼠子無煩避人去閒花疎竹聊眼前壁間蒼山  
未全落屋上青天宛如昨人生漂若不繫舟今夕姑從  
此菴泊朝來倘晴還杖藜浪迹惟有浮雲知客子休誇  
主人在主人不減客桑時

智舫

題破牕風雨圖

千山雲頭黑萬山雨脚白大風卷却屋上茆牀頭書卷

盡打濕幽人縮項破牕裏  
上蘚花長一尺若得溪流  
直到牀釣竿插向枕頭石

人日感舊

去年人日游何處  
穆家池館寒梅樹  
今年人日勞夢思  
穆家池館非舊時  
兀兀顏簷遥倚遍  
主人何日還相見  
村南村北柳樹邊  
煙條弄影青苔面  
竹圍衡門池水寒  
嗟君夙昔此盤桓  
而今細雨生春草  
縱有梅花若箇看

送生明還雪竇

殘月在松僧在戶犬聲如豹隔松塢霜厚如雪野易風  
空村家家門尚杜還山不問幾日程直造雲邊峯頂坐  
莫想錢塘江北庵琉璃一點如螢火

送葉熙時還新安省親尊公讀書于黃山之指

月菴

今年季秋與孟冬余也踏遍黃山峯歸來相對數竿竹  
倦錫倚壁雪滿屋送君手捉天台藤打破子陵灘下水  
欲識君家讀書處只問丹臺指月僧



道衡

登釣臺

丈夫於世各有營，豈為公卿以身辱？先生漢之一布衣，  
千古誰堪繼芳躅。我來停舟一登眺，雙臺杳渺林端矗。  
江水沈沈徹骨清，山光靄靄有餘綠。只此江山彼江山，  
嚴劉到今定誰屬？先生早知釣得名，拘折當年釣竿竹。  
有脚但可踏青山，何必將加帝王腹。

實訥

蝦蟆嶺

君不見蝦蟆嶺崔嵬橫截日無影特立太湖煙水中飛鳥  
何曾至絕頂崩崖挂倒樹日久生莓苔飛瀑灑石壁磴道  
鳴殷雷百步幾蟠曲去矣如復回蝦蟆嶺何年開日見  
行人天上來

陸卿子

贈毗陵安美人

去年花發毗陵道美人何處拾瑤草今年草綠姑蘇臺

美人此時花下來風吹羅袂香不定流波蕩漾光徘徊  
不逐行雲作飛雨夢裏鉛華學神女坐久煙霞拂袂生  
回眸愁向空中舉水遠山長不見君空聞樹上黃鸝語

徐小淑

早春

狂風撲簾烘雲熱粧樓鬢髮香膩滑一雙碧黛剪春山  
五十商絃邀夜月飛香走玉花散雪白浦澄江波亂發  
素練平空萬樹齊野綠絲絲生短髮

方孟式

題劉阮天台圖

青谿十里隨落花仙洞宵冥樵影斜雞鳴月下環重翠  
犬吠雲中淡遠霞瓊霜難住人問藥綵雲易散鄉心惡  
落花啼鳥寂無聲雨捲霞空澗冰薄天台清淚沾去衣  
片片桃花逐客歸明知後約仙緣在忍見丹崖芳草肥  
採藥空還尋舊好桃源咫尺迷瑤島胡麻寂歷怨東風  
當年悔不青山老

午夢

摘花浸酒解春愁  
奄奄似醉兀如秋  
風飄荷氣簾日午  
一枕清涼翠簟悠  
江山似現雲中影  
萍水遙同海底鷗  
蝶去逕尋千瓣蕊  
梅繁鶴夢一簾幽  
朦朧倦眼東窗日  
得失黃梁晷刻休

夕陽

日夕天高晚照窗  
歸雲迷岫影難雙  
汲水澆花鳥語接  
餘霞駁綺映羅牀  
鶯花寂歷逐人間  
樓臺暮景秋香怯

初夏

桃李辭春日卓午樓頭楊柳薰風舞池蛙鼓吹催花飛  
枝鳥笙歌憐客苦鏡裏眉顰白玉姿窗前人怨黃梅雨  
薔薇滴翠紅泥香拾翠如彈燕子語

葉納納

送妹瓊章于歸

畫堂紅燭影搖光蕭鼓聲繁遶玳梁頻傳簾外催粧急  
無語相看各斷腸鸞臺寶鏡生離色鴛帶羅衣惜別長

香靄屏帷凝彩扇風輕簾幙拂新粧新粧不用鉛華飾  
梅雪繇來羞比色傾國傾城自絕羣飛瓊碧玉驚相識  
相顧含情淚暗彈可憐未識別離難遙遙此夜離香閣  
去去行裝不忍看欲作長歌一送君未曾擗管淚紛紛  
追思昔日同遊處惆悵於今各自分昔日同遊同笑語  
依依朝夕無愁苦春閣連几學弄書秋牀共被聽風雨  
更憶此時君最小風流早已仙姿嫋雪句裁成出衆中  
新詞欲和人還少往事悠悠空自思從今難再不勝悲

休題往日今難再但願無慙別後期別後離多相見稀  
人生不及雁行飛杳杳離情隨去棹綿綿別恨欲牽衣  
戀別牽衣不可留張帆鼓吹潮中流可憐此去應歡笑  
莫為思家空自愁

鄭如英

秦淮別怨詩贈朝蓮生

秦淮二月新柳黃折柳貽人人斷腸可憐孌孌秦淮柳  
今朝又上離人手離人手把柔條看柔腸低拂紫騮鞍



紫騮欲嘶人落淚誰當此際猶能醉綢繆執手問前期  
蓮子花開是到時但恐見蓮君不見令人空憶桃花面  
青青草色長干道偏使離人顏易薨秦淮上流即豐溪  
我心隨水不復西請看不斷秦淮水有心寧不相思死

王微

寒夜泊湖上

湖煙暝暝山為空不開湖面如愁胸吳歌清激水氣通  
煙收水遠出兩峯徘徊歌罷月尚東露花上衣光融融

可憐此月天涯同

今夜寒

今夜寒寒且永一燈向壁懸孤影  
湖南鐘動湖北愁霜風殘月夜悠悠

鄭希良

秋望

秋光濃淡雨復晴海波不動含深綠  
平沙若剪雲嵯峨雁背斜光斷還續  
西風吹影落魚磯字字新出臨池墨

稻梁離離網弋多急向蘆花深處宿

渡頭楓樹霜初結海風吹滴猩猩血秋江上下鏡面平  
清光一片琉璃徹沙頭眠鷗忽驚起客帆飛去波明滅  
煙水蒼茫野牧歸數聲短笛吹新月

江村

青山影空釣石寒海門秋色濃可掬漁人帶蓑臥不驚  
沙鳥欲起還相逐一聲欸乃及暮歸南鄰喚酒酒初熟  
絲絲細雨急收網一抹斜陽挂枯木

許筠

出山別元參學

北宮星斗寒相映  
疊疊春山聞夜磬  
楚客初招萬里魂  
胡僧暫起經年定  
王孫綠草漸芳菲  
松月留人歸未歸  
歡喜嶺頭叢桂暗  
芙蓉峯下怪禽飛  
荷衣蕙帶宿雲濕  
寶殿沉沉鬼神泣  
明日朝陽江上行  
知君惆悵溪頭立

許筠

江天曉思

西飛燕東流水人生倏忽春夢裡一夜狂歌不盡歡十  
年惆悵情無已渚煙汀樹春朦朧曲欄珠箔星在東蘭  
臺鳴鼓逐曉發輕帆一片飛長空

趙希逸

謫中


歸心日夜關以東歸計即今還墮空一年春動萬里外  
孤山月出千秋中愁來但覺此身遠醉後不知我道窮  
瓊州雷州何許地古人今人同不同

金淨

秋閨

木落千山江杳杳秋空一雁秦雲渺空階月皎蛩音長  
蔓草露滴螢光小耿耿殘燈夜半過紅樓西畔落星河  
邊衣剪罷寒不寐颼颼西風鳴敗荷

御選明詩卷四十九



總校官庶吉士臣侍朝

校對官檢討臣蕭九成

謄錄監生臣周元